

26 NOV 2000

Banjir-Kedah

BANJIR: KOTA SETAR DAN KUBANG PASU MASIH SERIUS

ALOR SETAR, 26 Nov (Bernama) -- Banjir di Kota Setar dan Kubang Pasu masih berada dalam keadaan serius, sehingga pukul 10 pagi ini masih terdapat 3,121 orang dari dua daerah itu ditempatkan di pusat pemindahan.

Sementara itu, di Padang Terap keadaan terus baik, hanya 399 orang dari 88 keluarga masih ditempatkan di pusat pemindahan.

Jurucakap bilik gerakan banjir daerah Kota Setar berkata terdapat 1,846 mangsa dari Mukim Derang, Lengkuas, Bukit Pinang, Titi Gajah dan Pumpang ditempatkan di 19 pusat pemindahan.

"Keadaan air banjir masih bertahan. Kita harap keadaan menjadi semakin baik kerana sejak semalam hujan sudah tidak turun," katanya.

Di Kubang Pasu terdapat 1,275 mangsa yang dipindahkan, meningkat berbanding 691 orang petang semalam.

Menurut Setiausaha Kerja Umno bahagian Kubang Pasu, Saad Hashim, Perdana Menteri Datuk Seri Dr Mahathir Mohamad, dijadualkan melawat kawasan yang dilanda banjir hari ini.

Sementara itu, sebahagian kawasan yang terputus bekalan air paip sejak Jumaat, telah menerima kembali bekalan air paip mulai malam tadi walaupun tekanan air agak rendah.

Seorang jurucakap Jabatan Kerja Raya (JKR) berkata di beberapa kawasan lain bekalan air paip akan pulih dalam sedikit masa lagi.

Pengarah JKR Dr Nordin Yunus tidak dapat dihubungi kerana bermesyuarat dengan pegawai kerajaan negeri.

-- BERNAMA

MNH MZM RI